



Թիֆլիսի կօնսիստօրիան հետևեալ շըր-
ջաբերականն է ուղարկել քաղաքիս բոլոր
հայ դպրոցների հոգաբարձութիւններին,
ուսուցիչներին, աւագ ուսուցիչներին և ա-
ւագ վարժուհիներին.

Ազգիս Սրբազնագոյն Վեհափառ Հայրա-
պետի բարեհաճ տնօրէնութեան և վիճակա-
յին կօնսիստօրիայի ամսիս 8-ի № 4685
հրամանի համաձայն, խնդրվում է մեծա-
պատուութիւնիցդ ձեր խնամքին յանձնված
դպրոցի ուսուցիչ և ուսուցչուհիների, աշա-
կերտ և աշակերտուհիների հետ շնորհ բե-
րել ամսիս 13-ին, շաբաթ օր, առաւօտեան
ժամը 10-ին, Վանքի աւագ եկեղեցին, ներ-
կայ լինելու թարգմանչաց՝ ս. Սահակայ և
Մեսրոպբայ և հայ գրականութեան ու տպա-
գրութեան հանգուցեալ վաստակաւորների
համար կատարվող հոգեհանգստեան, իսկ
հետևեալ օրը, կիրակի, նոյնպէս ժամը 10-ին,
նոյն եկեղեցում Հայրապետական մաղթան-
քին: Եօրեկանական հանդէսը կատարելու
համար արդէն ուղարկված է ձեզ շրջաբե-
րականով ծրագրի մի օրինակ ի հրահան-
գութիւնս:

Համանման շրջաբերականներ ուղարկված
են և Թիֆլիսի թեմի բոլոր հայ ծխ. դըպ-
րոցների վարչութիւններին:



ՊԵՏԱԿԱՆ ԴՈՒՄԱՅԻ ԸՆՏՐՈՒԹԻՒՆՆԵՐԻ
ՇՈՒՐՋԸ



Երևան քաղաքի ազգաբնակութեան կող-
մից Պետական Դումայի համար պատուի-
րակներ են ընտրված քաղաքագլուխ Յովհ.
Մելիք-Աղամալեան և Հայկ Յովհաննիսեան:



Մենք հաղորդեցինք, որ հոկտ. 2-ին Շու-
շու քաղաքի ազգաբնակութեան պատուի-
րակ ընտրվեց Հ. Առաքելեան: Այժմ ստաց-
ված պաշտօնական գրութիւնից երևում է,
որ Հ. Առաքելեան ընտրված է պատուիրակ
ոչ միայն Շուշու այլ և Կարեազինի (Ջիր-
բայիլի) գաւառի ազգաբնակութեան կող-
մից:

